

**Thursday, February 12, 2026**

**Time - 2:30pm - 2:35pm**

**AKASHVANI AIZAWL**

**REGIONAL NEWS UNIT**

**RS MP**

Parliament inkhawm kal mekah vawiin khan Rajya Sabha MP Pu K. Vanlalvena chuan Zero Hour ah thu sawi hun changin, Mizorama kawngpui pawimawh pathum siam thuai a tul thu a au chhuah pui.

Hnahthial atanga Myanmar ramri kawng pahnih, Hnahthial-Tarpho-Khawhri-Cherhlun-Thingsai-Bualpui H- Saisihchhuah kawngpui bakah Hnahthial-Tuipui D-Darzo-SouthVanlaiphai-Sangau-Pangkhoa-Saisihchhuah kawngpui chu National Highway a puang ve ve turin sorkar laipui a ngen a. Kum 2020 ah Myanmar sorkarin Chin State khawpui Hakha atanga India leh Myanmar ramri Saisihchhuah thlenga kawngpui thlur hnih (double lane) an sial zawh tawh thu leh sorkar laipui a Ministry of Commerce and Industry in Saisihchhuahah ramri a insumdawn tawna hmun tenau Border Haat a puang tawh chungin kawngpui-in a la pawh loh thu a sawi chhuak bawk a. He kawngpui hi sial tlang a National Highway a puan an nih chuan Act East Policy tihlawhtlinna atan te, ram venhimna atan te leh Mizorama tribal mipuite ei leh bara hma an sawna atan te a tangkai hle tur thu a sawi a ni.

Pu K.Vanlalvena chuan Sairang Rel chawlhmun hawn thar a nih atangin Aizawl leh Sairang inkar lirthei tlan zat a pun pah nasat thu sawi bawkin, tuna kawngpui awm mek National Highway No. 54 chu a zau tawk tawh loh thu leh a rang thei ang bera thlur li (four lane) kawngpui a siam a tul thu a sawi bawk a ni.



**MUAY THAI**

Sports Minister Pu Lalnghinglova Hmar chuan 7th Senior National Muaythai Championship 2026 zawh taka Mizoram aiawha medal 12 latute chu vawiin khan a hnathawhna pisa-ah lawmpuina hun a hmanpui.

India rama Muaythai inelna sang hi January ni 22 leh ni 25, 2026 khan Hyderabad khawpui Telangana-ah intihsiak a ni a. Hetah hian Mizoram in infiammi 11 tirin mi 10 in inelna hrang hrangah medal 12 - gold medal panga, silver medal pathum leh bronze medal pali an la a ni. Pu Lalnghinglova Hmar chuan, National Championship a medal late leh telte a lawmpui thu leh, Senior National Championship-ah hetiang zat an la thei chu a lawmawm a tih thu a sawi a. Infiammi thei chungchuangte hnena pek thin Incentive Cash Award dawng thei zingah an tel tawh thu a sawi. Minister chuan Mizoram tana chawimawina tangkapui lak theihna nei infiammite hian mi hriat hlawh lo an ni fo thin niin a sawi a. Rampum huap leh a aia zau zawka tangkapui la thei tura beiseina nei an nih avangin thlurbing an nih tur thu a sawi a. Chawimawina tangkapui hlawhchhuaktute chu National Games atana an inbuatsaihna atan Muaythai Association of Mizoram hnenah hian cheng nuai thum pek an nih tur thu a sawi bawk a ni.

He lawmpuina hunah hian Muaythai Association of Mizoram lam atangin report bakah an hmabakte leh hmasawna atana an mamawhte ngaihthlak a ni a. Sports & Youth Services Department atangin Pu Dolianbuaia, Joint Secretary chuan thu a sawi bawk.



## **MORPHINE SEIZURE**

Police, SIB leh Assam Rifles te chuan Thawhlehi khan morphine dip (powder) kg 3 leh gram 518 an man.

Thawhlehi chawhnu lam khan Ngopa Police Check gate-ah Manipur lam atanga rawn kal Mukeen Ali (45) Mohatish Miranpur Shahjahanpur Uttar Pradesh a cheng khalh TATA Truck pakhat atangin morphine hi an man a. Morphine ni ngeia rin hi chassis chhunga thuhruk an hmu chhuak a. He truck a a chuan pui Kasim (36) Graam Devchara khua Bareilly district, Uttar Pradesh a cheng chu an man bawk a. Morphine phurhna atana hman truck hi an hren sak nghal bawk.

Truck khalhtu leh a chuanpuite hi Narcotic Drugs & Psychotropic Substances Act, 1985 hmanga thubuai siamsak an ni a, nimin khan district court-ah hruai an nih hnu-ah court chuan judicial custody a awm tura hrengin jail lamah thawn nghal an ni.



## **LANDSLIDE WARNING**

Disaster Management Minister Prof. Lalnilawma hma-ah nimin khan Leimin tur hriatlawk theihna atana Warning pe chhuak thei (Early Landslide Realtime Monitoring System) khawl entir chhinna hun hman a ni.

Sorkar thuchhuahin a sawi dan chuan he khawl hmang hian leimin mai theite a hriat zung zung theih dawn bakah Controlling Center-ah leh a bul hnaia mite hnenah warning a pe chhuak thei tura beisei a ni. He khawl hian rang takin seconds chanve lek chhungin realtime data cloud ah a thawn anga, chu chuan warning system a hmangtute control center ah a pe dawn a ni. Lei min thlen theitu chi hrang hrang atangin sensors transducer hman a ni a; information data base a keng tel nghal a, webservice bakah, direct realtime alert phone call leh sms a thawn nghal thei bawk a ni. Hei bakah hian point to point communication protocol hmangin internet leh mobile data a chhiat pawhin sensor reading leh alert a la thawn chhuak zel thei bawk a ni. He hmanrua hian nizung tha lakna leh electric pangngai a hmang kawp thei a, hmun kilkhawrah pawh awlsam taka bun mai theih a ni.

DM&R Minister hi DMR Secretary Pu Udit Prakash Rai leh Director Pu Chuahhuna te'n an tawiawm a. Minister hma a enchhinna buaipuitute chu Prof. Laldinpuia (Department of Disaster Management, Mizoram University), Dr. Morrel VL. Nunsanga (Department of Information Technology, Mizoram University), Dr. Reginald H. Vanlalchaka (Department of Electronics, Government Zirtiri Residential Science College) leh Pu Lalngaihzuala te an ni.



## **CM SPECIAL PACKAGE**

Mizoram State Policy Coordination Committee (MSPCC) thukhawm chuan Banakaih thawh hnihna hnuai a dilna lutte thlir hovin, CM Special Package hnuai dilna 372 leh loan dilna 134 an pawm.

MSPCC hi Planning & Programme Implementation Department Committee Room-ah Vice Chairman Dr. KC Lalmalsawmzauva hovin Thawhlehin khan an thukhawm a. He tah hian nodal department hrang hrang atanga loan leh CM Special Package dilna theh luhte an zirho mai bakah Partner Bank hrang hrang hmalak tawhnate enho a ni bawh a. February ni 9, 2026 thleng khan SBI in Progress Partner 82 hnenah loan cheng vaibelchhe 7, nuai 52, sang 9 leh 912 an pechhuak tawh a; Mizoram Rural Bank in Progress Partner 260 hnenah loan cheng vaibelchhe 20, nuai 61, sang 2 leh 150 pechhuak tawhin in Mizoram Cooperative Apex Bank in Progress Partner 42 hnenah loan cheng vaibelchhe 5, nuai 90, sing 7, sang 7 leh 866 an pechhuak tawh bawh. Heng bank pathum bakah hian Partner Bank dang IDBI Bank leh Union Bank of India te nen nasa zawka thawhho ni se an ti bawh.

